



Ipar Euskal Herriko



hauteskundeen emaitzak



Jacques Chirac eta Michelle Alliot-Marie, kanpainako ekitaldi batean.

RPR-UDF pozik «gobernatzeko izango dugun erraztasunagatik»

Alaitasuna eskuin aldean eta dezepzioa ezkerrean lehen emaitzekin

Joan den igandeko lehen itzularen ondoren, Ipar Euskal Herrian ere erreakzioak nabariak ziren atzo: dezepzioa ezker aldean eta alaitasuna eskuin aldean. Erran daiteke jokoak eginak direla bigarren itzulirako, Alain Lamassoure bostgarren hautes-barrutiko hautagaiak eta Michèle Alliot-Marie seigarrenekoak emaitza nahiko onak bildu dituztelako.

M. ESTEBAN / BAIONA

Iparaldeko RPR eta UDF alderdien ordezkariak pozik daude. Lamassourek adierazi zuenez: «Frantzia gobernatzeko erraztasun osoak ukanen dugu eta gauza ona izanen da. Gaur gure ahal- lasun guztiak bultzatu behar ditugu ekonomiaren sistema hobetzeko eta garatzeko». Michel Itxaspe laugarren hautes-barrutiko diputatuak urrutira ikusten du eta Lehendakariatzaz hitz egin zuen erranez: «François Mitterrand lehendakariarentzat kolpe txarra da dudarik gabe, Alderdi Sozialistaren desegitea eta gure emaitzak».

Beste alderdiei dagokienez, dezepzioa nabari zen batez ere PS, Berdeak eta Génération Ecologie alderdietan. Nicole Péry bostgarren hautes-barrutiko hautagai sozialistak deklaratu zuenez: «Orain dela bost urteko hauteskundeetako alderatuta aurten gure emaitzak oso txarrak

izan dira baina azpimarra dezaket azken urte hauetako emaitzak mantentzen ari garela Baiona aldeko eskualdean». Raphaël Lassallette Hendajako alkate eta PSko hautagaiak «emaitza oso txarrak» lortu zituela erran zuen beste komentariarik gabe.

BERDEAK ETA BADIOLA

Jean Lissar Berdeak alderdi ekologistaren hautagaiak erran zuenez: «Pentsatzen genuen emaitza hobea egingen genuela». Michel Veunac seigarren hautes-barrutiko hautagaiak, Génération Ecologier buruz honako hau salatu zuen «talde ekologista faltsua agerpena hauteskunde aurretik». Izan ere, Ekologista

Berriak alderdia agertu zen urte honetako hauteskundeetarako. Jean Lissaren ustez, «finantzarako tratu bat dago alderdi honen azpian». Bigarren itzulirako Berdeak alderdiak ez du iritzirik plazaratuko hautagai baten alde.

Paul Badiola Donibane-Lohizuneko auzapeza eta seigarren hautes-barrutiko hautagaiak ez zuen bere dezepzioa plazaratu nahi. «Zentrismoaren korrantea» landu nahi du bere eskualdean. Didier Borotra Miarritzeko alkatea eta UDFko senadoreak, Badiola sostengatu arren lehen itzulian, Alliot-Marierekin alde agertu zen atzo, bigarren itzulirako.



Raphaël Lassallette PSko hautagaia eta Hendaiaiko auzapeza.

Boto abertzalearen igoera «ilusio handiz» jaso du HBk

DONOSTIA

Herri Batasunak Ipar Euskal Herriko herritarrek zoriondu ditu alderdi abertzaleen boto kopuruak gora egin duelako. Igoera hori, txikia izan arren, «ilusio handiz» jaso du HBk eta etorkizunean joera hori berrindartuko delako itxaropena azaldu du.

Karmelo Landa europarlamentari abertzalearen ustez, hiru arrazoi nagusik azaltzen dute «uste baino askoz handiagoa» izan den alderdi sozialistaren porrota. Alde batetik, «Gobernuak zein alderdi sozialistak politika erabat eskuindarra eta neoliberala egin dute, batez ere gizarte eta politika arloetan, bai Estatu frantziarrarekiko, bai Europako gainontzeko komunitateekiko».

Ustelkeriak eta «neurri antisozialek» ere eragina izan dute PSk jasotako emaitzetan, Landeren iritziz, hala nola «Euskal Herria eta Europako beste zenbait nazioetara esaterako, kortsikarra eta bretoa— aurka egingen dako politika zentralistak eta gestio ezin okerragoak». Hain zuzen ere, euskal gatazkari irtenbidea emateko «errepresioaren alde apustu» egitea eta «irtenbide elkarrizketatuari muzin eginez Madriletik ezarritako jokoan sartzea» egotzi zien Landak sozialista frantziarrei prentsa agirian.

Hori dela eta, dei egin dio Frantzia osatuko den gobernu berriari «elkarrizketa eta bide negoziatuaren bidez euskal gatazkari irtenbidea eman diezaion,



Karmelo Landa.

herri eta herritar gisa dagozkigun eskubideak onartuz».

HBko ordezkariak uste du Frantzia jazo dena Espainian PSOERI gerta dakiokela bere jardura politikoa aldatzen ez baidu. Sozialista frantziarrek bezala, PSOE «politika erabat eskuindarra egiten ari da arlo politiko eta sozialean, ustelkeria lotsagabeki praktikatzen eta errepresioa eguneroko ogia izanik», Landeren esanetan. Ondorioz, PSren «antzeko emaitzak» jaso litza- keela PSOEk ohartarazi du buruzagi abertzaleak.

FNren igoera dela medio, «kezagarria da kutsu ultraeskuindarra duten alderdiek, xenofobia bultzatuz, gora egitea», esani du Landak eta horren errua sozialisten politikari egotzi dio.

UDF-RPRk Europarekiko izango duen jarreraren zain dago EAJ

DONOSTIA

Joan den igandean Frantzia izandako hauteskundeen emaitzak ezagutu ondoren «euskal herritarro interesatzen zaiguna gobernu berriak Europarekiko zein politika egingo duen jakitea da, batasun politiko eta ekonomikoarekin aurrera jarraituko duen, orain arte bezala, edo proiektua desestabilizatuko duen», Iñaki Anasagasti Euzko Alderdi Jeltzaleko diputatuak atzo adierazi zuenez.

Horretaz, buruzagi jeltkideak baditu bere hipotesiak, «Giscarden tesiek irabazten badute ez da arazorik izango. Gaullismoan Charles Pasqua garaitzen bada, ordea, gauzak oker joango dira», azaldu zuen prentsa ohar batean.

EAJri hori interesatzen zaiola, Europako prozesua alegia, «eta ez PP eta PSOEn jokoa» esan zuen Anasagastik, eta beraz uko egin zion Frantziako emaitzak eta Estatu espainiarrean urrian gerta litekeen konparatzeari,



Iñaki Anasagasti.

«ez baita eraginkorra» bere ustez.

Hala ere, Frantziako emaitzak aztertzeke orduan «bere jarrera etiko eta prepotentziagatik eta zatiketengatik dezepzionagarri gertatu den sozialismoaren hondamendia» azpimarratu zuen Anasagastik eskuinaren garai- peno baino.